

XIV bob. ODIL SUDLOVGA TAJOVUZ QILUVCHI HUQUQBUZARLIKLAR UCHUN MA'MURIY JAVOBGARLIK

180-modda. Sudga hurmatsizlik qilish

Guvoh, jabrlanuvchi, da'vogar, javobgar, ishda qatnashuvchi boshqa shaxslarning sudga kelishdan qasddan bo'yin tovlashida yoki mazkur shaxslarning va boshqa fuqarolarning raislik qiluvchi farmoyishiga bo'ysunmasligida yoxud sud majlisi paytida tartibni buzishda o'z ifodasini topgan sudga hurmatsizlik —

bazaviy hisoblash miqdorining bir baravaridan uch baravarigacha miqdorda jarima solishga sabab bo'ladi.

(180-moddaning sanksiyasi O'zbekiston Respublikasining 2019-yil 3-dekabrdagi O'RQ-586-sonli Qonuni tahririda — Qonun hujjatlari ma'lumotlari milliy bazasi, 04.12.2019-y., 03/19/586/4106-son)

181-modda. Sudning xususiy ajrimi (qarori) bo'yicha choralar ko'rmaslik

Mansabdor shaxs tomonidan sud chiqargan xususiy ajrimni (qarorni) ko'rib chiqmaslik yoxud ajrimda (qarorda) ko'rsatilgan qonunni buzish hollarini bartaraf etish choralarini ko'rmaslik, xuddi shuningdek xususiy ajrimga (qarorga) o'z vaqtida javob bermaslik —

bazaviy hisoblash miqdorining uch baravaridan besh baravarigacha miqdorda jarima solishga sabab bo'ladi.

(181-moddaning sanksiyasi O'zbekiston Respublikasining 2019-yil 3-dekabrdagi O'RQ-586-sonli Qonuni tahririda — Qonun hujjatlari ma'lumotlari milliy bazasi, 04.12.2019-y., 03/19/586/4106-son)

Qarang: Jinoyat-protsessual kodeksi 271-moddasining sakkizinchi xatboshisi, 298, 299-moddalari.

182-modda. Xalq maslahatchisining sudga borishiga to'sqinlik qilish

Mansabdor shaxsning xalq maslahatchisi o'z zimmasiga yuklatilgan vazifalarni bajarish uchun sudga borishiga to'sqinlik qilishi —

bazaviy hisoblash miqdorining bir baravaridan uch baravarigacha miqdorda jarima solishga sabab bo'ladi.

(182-moddaning sanksiyasi O'zbekiston Respublikasining 2019-yil 3-dekabrdagi O'RQ-586-sonli Qonuni tahririda — Qonun hujjatlari ma'lumotlari milliy bazasi, 04.12.2019-y., 03/19/586/4106-son)